

Parlimen: Hampir 90 Peratus Koperasi Bergerak Aktif
Bernama
26 Jun, 2012

KUALA LUMPUR, 26 Jun (Bernama) -- Hampir 90 peratus atau 8,385 daripada 9,516 koperasi yang didaftarkan di negara ini bergerak aktif sehingga ada yang mampu membayar dividen kepada anggotanya, persidangan Dewan Rakyat diberitahu pada Selasa.

Timbalan Menteri Perdagangan Dalam Negeri, Koperasi dan Kepenggunaan, Datuk Rohani Abdul Karim berkata sehingga Mei lepas sebanyak 498 koperasi telahpun membayar dividen kepada anggotanya bagi tahun kewangan 2011.

"Masih ada lagi koperasi yang belum menyelesaikan laporan audit untuk tahun lepas, dijangka selesai melakukan pengauditan bulan depan. Bila audit selesai, bilangan koperasi yang bayar dividen dijangka bertambah," katanya.

Beliau berkata demikian ketika menjawab soalan asal Mohd Nor Othman (BN-Hulu Terengganu) yang bertanya tentang bilangan koperasi yang berdaftar dan aktif di negara ini dan juga bilangan koperasi yang memberikan dividen pada tahun lepas.

Menjawab soalan tambahan Azan Ismail (PKR-Indera Mahkota) beliau berkata daripada jumlah koperasi didaftarkan, 92 peratus daripadanya berada dalam kategori koperasi kecil dan mikro yang mempunyai perolehan kurang RM1 juta setahun.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=675868>